

Mucha muher di 15 aña cu seis ribchi kibra den hospital

Debi na desgracia cu boto durante su bishita na Aruba

ORANJESTAD(AAN)—Diamingo atardi mas o menos 5.20 or un biaha mas a sosode un desgracia ariba lama caminda cu dos boto di placer a dal den otro y un persona a keda gravemente herida.

Cu urgencia mester a

transporta un jovencita bishitante di 15 aña, V.S. pa hospital ya cu e tabata sangrando masha hopi di herida ricibi, y a resulta despues cu el a kibra tambe seis ribchi.

Segun informacionnan cu a yega na redaccion di

DIARIO e jovencita aki tabata pertenece na un grupo, di Republica Dominicana cu a pasa Aruba y nan a hospeda na Aruba Concorde Hotel.

Nan a huur un boto di placer cerca un di e companianan cu tin canto di lamar na Palm Beach, y a resulta tambe di ta un di e companianan cu aparentemente no tin asegurado tampoco pa clientenan cu huur boto.

Actualmente ta na Aruba e lider di e grupo G.D. cu ta hospeda na e hotel, y tambe e jovencita cu ta den hospital, pero sin manera di por paga e hospi-

tal siquiera, y kizas sin manera di por paga e hotel, segun un informante a duna di conoce na DIARIO.

E informante a duna di conoce cu hotel no ta tuma responsabilidad pa e caso aki pasobra lamar no ta territorio di hotel, y ademas di esey, e desgracia no a tuma lugar cu ningun boto cu lo por ta pertenece na e hotel tampoco.

Na varios ocasion desgracianan similar a tuma lugar y continuamente ta ser mustra ariba e hecho cu mester bini stipulacion pa propietario di e

botonan cu nan ta huur especialmente un asegurado obligatorio. Tin di e companianan grandi cu ta pagando te 1200 florin pa luna na asegurado pa nan clientenan y prome cu yega na permiti cu kende cu ta por huur boto cu turistanan, mester existi tambe asegurado.

Actualmente un mucha muher di 15 aña di edad ta den hospital gravemente sin cu tin caminda cu e por cana debidamente pa cubri tur e gastonan, no unicamente di su tratamiento medico pero tambe e gastonan di hotel cu ta ser paga pa su lider etc.

Detencion di polis a wordo prolonga

ORANJESTAD(AAN)—E caso di e agente policial cu ta cera actualmente den detencion preventivo tabata topico di dia ayera, no como un caso di maltrato manera comentarionan sa ta normalmente den casonan di verdadero maltrato, pero mas bien como topico cu mester, wordo investiga profundamente, especialmente considerando e persona cu a haci e denuncia y e gravedad di e caso aki.

Den seno di cuero policial tin masha malcontento cu detencion di e agente policial, y ayera varios agente a informa cu nan no ta bin traha pa motibo di ta malo na cas, pero aki no por bisa tampoco cu ta trata di un accion inoficial den apoyo di e agente policial of si ta realmente nan ta malo pa casualidad net ayera y cu nan malesa no tin di haber cu e caso aki.

E agente policial K. ta cera na warda di polis na Playa despues cu un ex detenido menor di edad H.A. kende ta un recidivista conoci, y cu hasta su mayornan aparentemente no por mas cune, a denuncia e agente K di maltrato. H.A. tabata deteni pa investigacion y for di su cel mes e tabata causa problema na warda di polis cu insultonan constante dirigi na agentenan policial.

Ora cu e mester a wordo hiba recherche pa interrogacion, aparentemente e agente policial K. segun declaracion di H.A. lo a maltrate cu faha y cu klop y tambe dal su cabez na muraya.

H.A. tabata tin dos marca di faha na braza y pia. Dos inspector hunto cu fiscal a cuminsa investiga e caso aki despues cu keho a ser duna di maltrato.

Cuerpo policial no kier duna mas comentario relaciona cu e caso "na interes di e investigacion", cu ta andando.

Ayera e agente policial L.K. a presenta dilanti fiscal y su detencion a ser prolonga. Informacion cu DIARIO a logra haya ta indica cu di tur dos banda e caso ta completamente investiga.

Si resulta despues cu e agente policial no tin ningun falta e lo bay completamente liber, pero si resulta sin embargo cu e tin falta den e caso aki, e caso lo bay te dilanti juez. Segun mando policial, e caso aki mester wordo investiga completamente y profundamente prome cu duna mas informacion.

Den seno di cuerpo policial tur atencion ta dirigi ariba e investigacion aki, y por a nota ayera cu tin varios agente policial cu no ta mucho contento cu e caso aki, y manera a ser expresa na DIARIO, "aki por ripara con fragil trabao di polis ta y con kende cu ta por bisa algo contra polis y sali gana tambe", refiriendo ariba un caso cu tabata tin na Curacao caminda te cu dia di awe un agente policial ta perhudica pa motibo di declaracion cu un muher americano a haci contra su persona, mientras cu aparentemente un otro testigo cu tambe a testigua contra e agente lo a laga sa despues cu tur cos tabata un mentira, pero e polis si ta perhudica te ainda, pasobra no kier revisa e caso.

Bond di polis tambe ta siguiendo e caso aki di cerca y ta sperando su desarrollo prome cu di parti di e bond algo sali di comentario ariba e caso aki tambe.

Negociacionnan cu Exxon den bon caminda

Betico Croes ta sali pa Venezuela

ORANJESTAD(AAN)—E siman aki e grupo canades mester bini cu nan pruebanan pa Gobierno di Aruba y si nan ta cla pa tuma e refineria over. Noticia cu gobierno a ricibi di e grupo ta cu nan a finaliza nan conversacionnan y gobierno ta spera di haya informacion di nan e siman aki.

Gobierno di Aruba ta un poco mas optimista cu e tabata durante ultimo simannan. Impresion ta cu tumamento over di e refineria ta bayendo den bon caminda.

Ayera mainta e comision negociador a reuni cu Exxon y a continua ayera anochi cu e reunion y esaki a trece cune cu e por bisa cu e negociacionnan ta bayendo basta bon pa aumenta e optimismo di gobierno di Aruba pa por yega na areglo cu Exxon.

ga na areglo cu Exxon.

Segun DIARIO tin entendi dentro di algun dia si tur cos bay bon den e negociacionnan tanto cu Exxon como cu e grupo Canades di Genoil, un delegacion lo sali pa Francia, unda aparentemente e firmamento di contrato lo tuma lugar entre gobierno di Aruba y ehecutivonan di e compania Canades.

Awe Consehero General Sr. Betico Croes ta sali pa Venezuela pa delibera cu funcionarionan halto encunto deseo di Aruba pa por haya combustibel na prijs preferencial. Na Venezuela e lo reuni aparentemente tambe cu presidente Jaime Lusinchi, ministro di energia Arturo Hernandez Crisanti y tambe cu Hernan Anzola y cu funcionarionan di PDVSA.

Tur indicacion ta cu PDA mester bay juez

Pa haya participacion den eleccion

ORANJESTAD(AAN)—Diabierna venidero Consejo Supremo Electoral ta reuni publicamente encunto validez di listanan pa eleccion dia 22 di november y pa mantencion di decisionnan encunto candidatonan cu ta aparece ariba e listanan.

Consejo Supremo Electoral a reuni pa investiga e listanan cu a ser entrega y pa eventual cambio-

nan ser haci ariba esakinan.

Esakinan tabata por ehemplo cantidad di firmanan necesario pa yena lista, cambio den nombernan cu lo no a ser presenta correcto ariba listanan, fechanan di nacemento cu lo no tabata correcto, tambe si encaso un candidata ta casa of viuda pa haci cambianan necesario den yenamento

di faam etc.

Tambe mester tin e aprobacion di candidatonan cu nan ta dispuesto pa aparece ariba cierto lista como candidato.

Di e listanan cu a ser entrega, durante investigacion haci, MEP no tabata tin ningun cambio pa haci, mientras cu lista di AVP, PPA y ADN si mester a haci cierto co-

Segui lesa pag. 4